

SARS e fana ka lesedi la morao tjena mabapi le sehla sa ho faela sa batho ka bomong mmoho le ditherasete

Tshwane, 5 Phato 2021 – Ditshebeletso tsa Lekgetho tsa Afrika Borwa (SARS) di lakatsa ho hopotsa balefalekgetho bao e seng ba nakwana ho faela dikgutliso tsa bona ka tsela e bolokehileng le e bonolo ya dikanale tsa dijithale tse teng le hore ba etse sena pele ho letsatsi la ho qetela la 23 Pudungwana 2021.

Dikanale tsena tse teng tsa dijithale di akaretsa ditshebeletso tse fapaneng e leng eFiling, SARS MobiApp, websaete le tshebeletso e ntjha e sa tswa tsebiswa ya SMS. Tsena di bolokehile mme o ka di sebedisa ho qoba tshwaetso ya Covid-19 ka ha balefalekgetho ba ka di sebedisa ba ituletse hamonate malapeng a bona.

Tshebeletso ya SMS e dumella balefalekgetho ba se nag *data* e kaalo ho fihlella dikhompyutha kapa dismartphone tsa bona ho romela SMS ho SARS ka ho sebedisa nomoro ena 47277 ho lekola hore na ba hloka ho fana ka kgutliso kapa tjhe (ha se balefalekgetho kaofela ba lokelang ho fana ka kgutliso).

Balefalekgetho ba ka romela SMS ho 47277 ho kopa nomoro ya referense ya lekgetho mmoho le seteitemente sa akhaonto kapa seteitemente sa balanse. E ka nna ya boela ya sebediswa ho hlophisa kopano, ho bua le moemedi wa SARS kapa ho hlophisa ketelo ya lekala. Dintlha tse mabapi le ka moo tshebeletso ena ya SMS e ka sebediswang ka teng di fumanaha websaeteng ya SARS e leng www.sars.gov.za

Dikanale tse ding tse kang eFiling le SARS MobiApp di ka sebediswa ho tea botjha *username* le *password*, ho faela kgutliso, ho fumana maemo a boikobelo ba tefo ya lekgetho, ho etsa tefo le tse ding tse ngata.

SARS e rometse dihlahlabo tsa hanghang (auto assessments) tse 3.4 million ho tloha ka la 1 Phupu. Ke balefalekgetho ba ka bang 1 million bao ho fihlela jwale ba amohetseng dihlahlobo tsena tsa

hanghang, mme palong eo ke ba ka bang 800 000 ba ananetseng tsena ntle ho etsa ditokiso dife kapa dife. Sena se bontsha kananelo ya sekgahla sa 82%.

Dipuisano tsena tsohle le SARS di entswe ka tshebediso ya eFiling le MobiApp, mme MobiApp e bone keketsheho ya tshebediso ya 60% ha ho bapiswa le ngwahola.

SARS e lefile dipusetso tsa R 8 billion, mme sena ke 87% ya balefalekgetho ba neng ba lokela ho di fumana. Dipusetso tsena di lefilwe balefalekgetho nakong e sa feteng dihora tse 72, mme sena ke bopaki bo bong ba hore dikanale tsa rona tsa dijithale di feela di sebeletsa balefalekgetho.

Balefalekgetho ba sa kgoneng ho sebedisa efe kapa efe ya dikanale tsena ba ka etsa tlhophiso ya kopano ho etela lekala lefe kapa lefe la SARS mme ona a tla bulwa hape ka la 16 Phato. Kopo ya kopano e tla tiiswa ke SARS mme ke balefalekgetho bao dikopano tsa bona di tiiseleditsweng feela ba tlang ho sebeletswa pele mme ba bang ba tla thuswa ka mora bana.

Hodima moo, SARS e tla sebedisa Dibaka tse Kantle tsa Tshebeletso tse kang diyuniti tse tamayang tsa lekgetho mmoho le dibakana tsa tshebeletso dibakeng tse nang le batho ba bangata e le boiteko ba ho anetsa ditshebeletso tsa rona ho balefalekgetho. Dintlha tse mabapi le matsatsi le dibaka di tla tsebiswa websaeteng ya SARS e leng www.sars.gov.za.

Khomishenara Edward Kieswetter o itse, “Ke lakatsa ho ipiletsa ho balefalekgetho ho ipotsa hore na ho feela ho hlokeha hore motho a etele lekala kapa ka mohlomong a mpe a sebedise dikanale tsa rona tse ntjhafaditsweng tsa dijithale.”

Ho fumana lesedi le fetang lena, ikopanye le Sarsmedia@sars.gov.za